

01 September. 2026

समे .18:15 Hrs

<><><><><><>

Headlines

- मुखमन्त्री उमर अब्दुल्ला होरें जम्मू-कश्मीर च कम्म-कारोबार करना सखल्ला बनाने लेई जत्तें दी समीक्षा गितै इक व्यापक जायजा बैठक लाई।
- शैहरी चनौती कोष तैहत जम्मू-कश्मीर नै 2 ज्हार 692 करोड़ कोला मती लागत आहिलएं त्रै बड्डी शैहरी विकास परियोजनाएं गी मंजूरी दिती ऐ।
- उत्तर रेलवे नै 19 अक्तूबर थमां बडगाम-कटडा बश्कार विशेष एक्सप्रेस रेल गड्डी दी सेवा शुरू करने दी घोशणा कीती ऐ।
- जम्मू-कश्मीर पुलसै इक बड्डे साइबर अपराध बारै सौहगा कीता ऐ, एंडरायड फोन इस्तेमाल करने आहलें गी मता सौहगा रौहने लेई आखेआ ऐ।
- मौसम विभाग मूजब जम्मू-कश्मीर च जुलाई ते अगस्त म्हीने दरान 6 प्रतिशत बाद्रू बरखा दे कन्नै इस बारै सामान्य बरसांत रिकार्ड कीती गेई।

<><><><><><>

CM-E.o.D.B Review

मुखमन्त्री उमर अब्दुल्ला होरें जम्मू-कश्मीर च कम्म-कारोबार करना सखल्ला बनाने लेई कीते जा'रदे जत्तें दी समीक्षा लेई इक व्यापक जायजा बैठक लाई। बैठक दरान मुखमन्त्री होरें नियमन प्रक्रिया गी सखल्ला ते तरतीब च आहनने लेई इनें कम्में च आवारदिएं दिक्कतें-रूकावटें गी दूर कीता जा। उनें जम्मू-कश्मीर च रास-पूंजी लाने लेई कारोबारिएं, उद्यमिएं ते उद्योगपतिएं गी आकर्षित करने लेई ते कन्नै नमिएं काहडें गी बढावा देने लेई बनकदा म्हाँल ते सुविधां उपलब्ध करोआने पर जोर दित्ता ते पैहले सवां मजूद प्रक्रियाएं ते बवस्थाएं च होर सुधार आहन्ने लेई आखेआ। उनें आखेआ जे तरतीब बद्द बवस्था ते प्रक्रियां ते कन्नै कुशल शासन जम्मू-कश्मीर दे टिकाऊ आर्थिक विकास बादे लेई अत लाजमी ना।

<><><><><><>

CS-UDD Projects

मुख्य सचिव अटल डुल्लू हुंदी अध्यक्षता आहली केंद्र शासित प्रदेश सतह दी मते इखतयारें आहली संचालन कमेटी नै 2 ज्हार 692 करोड़ 58 लख रुपे दिएं त्रै प्रमुख विकास परियोजनाएं दी मंजूरी देई दित्ती ऐ। शैहरी विकास सरबन्धी इन्हें परियोजनाएं गी मंजूरी केंद्र दे शैहरी चुनौती कोष दे तैहत दित्ती गेई ऐ। इन्हें परियोजनाएं च जम्मू ते तवी रिवर फ्रंट लेई तरंग ते श्रीनगर नगीन झील दे नमें सिरेआ संवारने, जान भरने लेई तरंग ते कटड़ा च जात्तरा लेई संगठित सुविधाएं सरबन्धी कृपा परियोजना शामिल ना। इन्हें पहलकदमिं दा मकसद सार्वजनिक प्राइवेट ते बजार आधारित सांझी रास-पूंजी गी बढ़ावा देना ऐ। इन्हें परियोजनाएं दा मकसद शैहरी ढांचे च सैलसफा, आओजाई ते आर्थिक गतिविधिं च बेहतरी आहनना ऐ।

<><><><><><>

Janamashtmi

जन्माष्टमी समारोहें कोला पैहले उधमपुर जिला प्रशासन नै चीनी गट्टू डोर दी बिक्री ते इस्तेमाल पर पूरी चाल्ली पांबदी लाई दित्ती दी ऐ। इस हुक्म दी अमलावरी जकीनी बनाने लेई खलाफवर्जी टीमां तैयार कीतियां गेदियां न जेहिडियां बजारें च जाइयै जांच करा करदियां न जे कुदरै कोई इस चाल्ली दी डोर दी खरीद-फरोखत ते नैई करा'रादा ऐ। 10 मिम्बरी जांच टीम दी अध्यक्षता तहसीलदार उधमपुर जय सिंह करा करदे न ते टीम जिले दे बक्ख-बक्ख बजारें च चानचक्क जांच करा'रदी ऐ। इस मुहिम दा मकसद आम लोकें ते पक्षिं गी इस डोर दे कारण होने आहले नुकसान शा बचाना ऐ कीजे आए दिन एहू खबरां सुनने गी मिलदियां न जे गट्टू डोर कन्नै चीरा लगाने नै कुसै दी मौत ते केई लोक जख्मी होई गे ना। इस मुहिम बारै गल्ल करदे होई तहसीलदार उधमपुर जयसिंह होरें आखेआ

<><><><><><>

Udh. Farming

राईबाई दे क्षेत्र च उन्नत ते साइंसी ढंग-सरिस्तें गी बढ़ावा देने दे मकसद कन्नै उधमपुर जिले दे धनास ग्रांठ थमां अनुसूचित जातिं दे 20 करसानें, जेहडे खुम्बें दी खेती करदे न, गी कृषि विज्ञान केंद्र पठानकोट भेजेआ गेआ ऐ तां जे ओहू खुम्बे दी काश्त दे नमें ढंग-सरिस्तें कन्नै वाकफ होई सकन। इन्हें करसानें गी विधायक बलवंत सिंह मनकोटिया होरें झंडी दस्सियै रवाना कीता। इस मौके उधमपुर दे मुख्य राईबाई अधिकारी विकास पाधा ते होर अधिकारी बी मजूद हे। इस मौके बोलदे होई विधायक बलवंत सिंह मनकोटिया होरें आखेआ

<><><><><><>

Prog. Announcement

आकाशवाणी जम्मू दे क्षेत्रीय समाचार एकांश आसेआ 2 सितंबर गी दपैही साड्डे 12 बजे राश्ट्री पोषण सप्ताह दे सिलसिले च 30 मिंटे दी इक विशेष परिचर्चा प्रसारित कीती जाहग। एहदा विशेषार होग “संतुलित आहार थमां बेहतर सेहत तगर जीवन लेई पोषण”। इस कार्यक्रम च खास मेहमान होडन जम्मू-कश्मीर दे मन्ने-परमन्ने दे डाइटिशियन विक्रम सबरवाल, जेडे इस विशे पर अपने माहिराना बचार सांझा करडन। इस कार्यक्रम दी मेजबानी न्यूज एंकर विजय बजाज हुं’दे आसेआ कीती जाहग।

<><><><><><>

Budgam-Katra Regular Run

रेल यात्रिएं दी यात्रा गी सखल्ला बनाने लेई उत्तर रेलवे नै बडगाम श्री माता वैश्वो देवी कटड़ा स्पेशल एक्सप्रेस रेल गड्डी दी नियमित सेवा 19 अक्तूबर थमां शुरू करने दा फैसला कीता ऐ। एह ए.सी चेयर कार रेल गड्डी हफ्ते च 6 दिन चला करग। ऐतवारें इस गड्डी दी सेवा उपलब्ध नैई होग। रेल गड्डी नंबर 04688 बडगाम थमां बड्डुलै 7 बज्जियै 20एं मिंटे पर खाना होआ करग ते दपैहरी 1 बजे कटड़ा पुजा करग। जिसलै के रेल गड्डी नंबर 04687 कटड़ा थमां दपैहरी 1 बज्जियै 45एं मिंटे पर खाना होआ करग ते रातीं 8 बजे बडगाम पुजा करग। एह रेल गड्डी श्रीनगर, अनंतनाग, काजीगुंड, बनिहाल, रियासी ते रस्ते च किश होर स्टेशनें पर रूकग। होर मती जानकारी आस्तै यात्री रेल मदद गी 139 नंबर पर फोन करी सकदे ना। मेद ऐ जे इस गैहू कन्नै कश्मीर घाटी ते कटड़ा च श्री माता वैश्वो देवी जी दी पवित्तर गुफा दे दर्शनें लेई सफर करने आहले लोकें गी सखाल होई जाहग।

<><><><><><>

Cyber Fraud Advisory

गृह मंत्रालय दी सलाह मगरा जम्मू-कश्मीर पुलिस नै एंड्रायड फोन इस्तेमाल करने आहले लोकें गी अक्षील ऐप्स ते सोशल मीडिया विज्ञापनें दे राहें प्रचारित धोखाधड़ी कन्नै जुड़े दे बधदे माली घोटाले दे बारे च खबरदार कीता ऐ। पुलिस नै नाइट प्ले, रीलूप, किस, वीमो, रिवो, नेक्सो ते विक्सा जनेही ऐप्स कोला बचने दी सलाह दिती ऐ। इनें ऐप्स दे राएं उपकरणें पर नियंत्रण हासल करने ते गैर कनूनी लैन-देन करने लेई एक्सेसीबिलिटी अनुमतिएं दा गलत इस्तेमाल कीता जाई सकदा ऐ। लोकें गी सलाह दिती जंदी ऐ जे ओह छड़ा मान्य स्टोरे थमां गै ऐप डाउनलोड करन ते कुसै बी संदिग्ध लिंक जा ए.पी.के फाइलें थमां परहेज करन। जेकर कोई बी साइबर फ्राड दा शिकार होंदा ऐ तां ओह फौरन हेल्पलाइन नंबर 1930 पर जां राश्ट्री अपराध रिपोर्टिंग पोर्टल दे राएं धोखाधड़ी दी सूचना देई सकदा ऐ।

<><><><><><>

Jammu Film Fest.

5मां जम्मू फिल्म महोत्सव 28 ते 29 सितंबर गी जम्मू च होआ'रदा ऐ जेह्दे च भारत ते दुनिया भरै दे फिल्म निर्माताएं ते फिल्में गी इक मंच पर किट्टा कीता जाह्ग। 2 दिनें तगर चलने आहले इस महोत्सव च 16 मुखें दियां 41 फिल्मां दस्सियां जाडन, जिनेंगी 35 मुखें दिएं 210 प्रविष्टिएं चा चुनेआ गेआ ऐ। इस कार्यक्रम च 5 डाक्यूमेंट्रियां, 5 फीचर लिंमा, 30 लघु फिल्मां ते 2 म्यूजिक वीडियो शामिल ना। एह्दे अलावा मुकामी ते इलाकाई प्रतिभाएं गी दस्सने लेई 12 क्षेत्रीय फिल्में गी बक्खर-बक्खरे तरीके कन्नै प्रदर्शित कीता जाह्ग। इस महोत्सव दा मकसद सिनेमा च बक्ख-बक्ख भावें गी उजागर करना, फिल्म निर्माण गी प्रोत्साहन देना ते भारत ते अंतरराष्ट्री स्तर पर फिल्म निर्माताएं ते व्यापक फिल्म समुदाय कन्नै जम्मू दे सरबंध गी मजबूत करना ऐ।

<><><><><><>

JK-Weather

जम्मू-कश्मीर च जुलाई ते अगस्त म्हीने सामान्य कोला 6 फीसद मती बरखा दर्ज कीती गई ऐ। तोआई, मौसम विभाग नै जम्मू-कश्मीर च अगले किश दिनें तगर आमतौरा पर गर्म ते गुम्मे आला मौसम बने दे रौहने दे असार दस्से ना। पर विभाग नै इस दौरान किश थाहरें पर हल्की बरखा बरने दी बी पेशनगोई कीती ऐ। आकाशवाणी दे जम्मू संवाददाता नै जानकारी दिती ऐ जे मैहकमे दा आखना ऐ जे अज्ज टांवी-टांवी थाहरें पर हल्की बरखा बरी सकदी ऐ ते फ्ही 2 सितम्बर शा लेइयै 10 सितम्बर तोड़ी किश थाहरें पर हौली बरखा बरी सकदी ऐ। करसानें गी मौसम सरबंधी परामर्श गी ध्यानै च रखदे होई गै बाड्डी ते होर दुए राई-बाई सरबंधी कम्मं गी जारी रखने दी सलाह दिती गई ऐ। इस बारै होर जानकारी दिंदे होई मौसम विभाग दे निदेशक मुख्तार अहमद होरें दस्सेआ

<><><><><><>